

Fastitgs profunds ella neiv

Il Club da skis Sedrun festivescha il 100avel

■ **(anr/gv) Pil 100avel anniversari dil Club da skis Sedrun ha Tarcisi Hendry retschercou ella liunga historia dil club ed ediu ina brochura festiva. Quella presenta el sonda proxima a Milez a carchun dallas festivitads da giubileum.**

Leu vegnan era ils skiunzs veterans undrai ed ei dat ina demonstraziun dalla gruppa dad OG e dils scolasts da skis. La sera festivescha il club presidiaus actualmeins da *Gebharda Berther* ensemen culla populaziun tuatschina ella halla dalla scola. Il proxim text ein extracts dalla brochura da fiasta.

Cun slondas

La naschientscha dil turissem d'unviern en Tujetsch schai entuorn l'entschatta dil 20avel tschentaner. Pli e pli savens vegnevan jasters cun skis sul Pass Alpsu da Milez oragiu ella Val. Els ein vegni admirai, buca mo dils affons, anzi! Els han fatg marveglias e queidas. Ils ins han viu la pusseivladad da semover pli spert e tgunsch atras la Val, ils auters han era giu ina outra vesta, sche buca visiun. Aschia ei il club da skis vegnius fundaus igl onn 1914.

Ils emprems onns ein els ton sco ina gruppa, quella lavura denton mordio pil club e per la carschientscha da quel. L'entschatta ei greva e nova. Per far attractiv il club vegn scochemai organisau cuorsas, gl'emprem pils affons e lu era pils commembers dil club. Quellas cuorsas contribueschan alla popularitad dil club. Ora-

vontut ils buobs ein la gronda reclama per l'uniun. Il club fa veramein tut pusseivel per promover ils affons ed ils commembers dil club. Ils onns 1920 ein buns e da buna prosperaziun. Igl onn 1925 dumbra el gia 25 commembers e naven da 1927 fan era jasters part dallas puschidas dil club e daventan commembers. Quels onns flurescha il turissem d'unviern ella Val. Numerus hosps dalla Bassa passentavan jamnas da sport ella Val. L'uniun da cura e traffic vegn fundada per dar dapli peisa alla nova plonta economica dalla vischnaunca. Ils Turitges fundeschan igl onn 1928 ina subsecziun dil club indigen cul num «Club da skis Sedrun/Tujetsch –

Secziun Unterland». Igl onn 1935 dumbra l'uniun 130 commembers activs e passivs. Da quels eran 78 dalla secziun turitgesa.

Emprems runals

Ils onns 1950 trai in vent cun in sforz ed ina energia ella populaziun ed el club per promover in svilup turistic d'unviern enteifer la Val. Cun la sutgera Cungieri igl onn 1956 ed il runal sill'Alpsu 1959 se-porschan novas pusseivladads pil sport da skis e pil club. Tonpli semida quei lu aunc pli fetg cun l'avertura dil territori da kis a Milez igl onn 1962. Quasi quater decennis organischescha il club cuorsas grondas a

Milez ni sil Pass Alpsu – cuorsas regiunals, naziunals ed internaziunals. Ils onns ein buns pil club.

Quei ei buca stau adina aschia. Aunc cuort suenter la Secunda uiara mundiala aveva il president dil club constatau: «La cuorsa dil Derby ei per nus ina fetg schampira. Nus stuein constatar che cun in aschi pign diember da concurrents ch'il spert per nossa biala cuorsa rapida dil Crispalt tochen a Dieni ei ina schliata reclama.» Dil rapport dil president dil 1949 ei vinavon da leger: «Sco mintgin sa ein las relazioni denter il club da Turitg ed il nies ualti tievias e perquei ch'els strusch salidan nus pli vulein nus era buca sfurzar. Sco vus

veseis stat nossa uniun da skiunzs sin in schliet scalem ed ei drova far ina midada fundamentala. Nus duvrein commembers ch'ei activs e buca dormulents. Sco nus stuein constatar va ei onn per onn anavos. Buca ch'il diember sesminui, mo-bein il spert da lavur e sacrifici maunca.»

Festivau treis dis

Dapli ch'il tschienavel aveva il Club da skis Sedrun festivau il 75avel. «Il 75avel, anno 1989, ei vegnius festivaus da camifo. Treis dis il meins fenadur, ils 16 tochen ils 18, ha il club fatg fiasta. Il venderdis sera ei staus dedicaus ad in lotto. La sonda han giugs sportivs giu liug silla piazza da ballapei e la sera fiasta cun sault. La dumengia ha in grond til presentau la historia dil club da skis e silsuenter ei stau fiasta en tenda. La fiasta da giubileum accentuescha e demonstrescha la posiziun dil club, sia forza e sia funcziun vargada ed actuala. Ils 250 commembers e commembras muntan enzatgei e sustastrehan la valor da quell'uniun.»

Ski alpin e cuorsa liunga

Il Club da skis Sedrun s'engascha per las differentas spartas dil sport da neiv. Il 1974 ha il club organisau l'emprema cuorsa liunga «La Tuatschina» e pli tard ei quella cuorsa vegnida remplazzada cul Maraton dalla Surselva organisaus il schaner vargau per la 25avla ga. Actualmeins ha il club ina gruppa da giuvenils da ski alpin e dapi paucs onns ina gruppa nordic.



1965 ha il Club da skis Sedrun organisau il campiunadi grischun da cuorsa liunga. Sonda festivescha il club il 100avel.

MAD